

## Plenchi

### Bèl a bati

Bèlèm tring..bèlèm tring....nos ta kla ta wardabu subi nos plenchi di skol. Ehe nos a kaba di disfrutá di un siman kargá ku tumba. Dushi mes ora e musika zona pone bo kurpa move sin por stòp. Ratu ratu e awaseru a disidi di djoin e ambiente aya na Festival Center pone hopi hala skonde. Hopi bon ritmo mes. E elekshonnan ta un tras di otro awor pa asina tur reina, prens i pancho ta nombrá. Na skolnan tur hóben ta den e ambiente di legria. Nan ta siña moviendo riba e ritmo. Gosa e ritmo pero sin neglishá bo lèsnan.

Nos tabatin apertura oficial di Soeur Hedwigschool na st. Maria. Un apertura masha simpel i bunita. E direktor di skol sra Naaldijk a kòrda duna apresio na tur kolega i èks kolega ku a kontribuí na e skol di awe. Un danki speshal el a duna na Carla Ricardo, e direktora ku a kuminsá ku tramité pa un skol nobo promé el a baha. Te hasta esnan ku ya a bai sosegá serka Señor.

E skol ta un presiosidat. Nos ta kontentu ku banda di e aporte di tur persona den skol i tambe di sr. Brion di komishon di mayor, tin sponor ku a hasi posibel realisá e soño aki. Danki na USONA, speshalmente na señor Reginaldo Doran, pa su aporte finansiero asina supstansial pa nos por a kuminsá ku e skol. Nos a kuminsá sin tur fondo pa traha e skol, pero promé nos a yega den pèrta nos a haña grato notisia ku Refineria Isla Korsou ta dispuesta pa duna nos tambe un montante gordo pa kaba e skol. Masha danki na tur dos organisashon ku a mira e nesesidat i a yuda ku tantu generosidat. Danki tambe na tur otro spònsernan ku tur a duna loke nan tabata por pa asina nos por a logra un skol bunita. Nos ta apresia tur aporte, chikí i grandi. Riba potrèt impreshon di e apertura.

E arkitekto Frans Piket a hasi tremendo trabou pa deseña e skol huntu ku e direktor.

### Den Agenda

Fakansi di skol

1 februari manisé di marcha hubenil

8 te 14 februari relashoná ku marcha grandi

## **Riba roster**

**RK MTS tambe tabata di fiesta siman pasá. Nan a hasi apertura di kantina, gym i sentro pa siña. Den un ambiente ameno a habri e 3 lokalidatnan aki pa asina duna e hóbennan mihó posibilidat den skol. Pabien RKMTS ku boso 3 den 1.**

## **Mi ta konta**

**Jeroen tabata gusta hunga bou di un palu di mangu patras di su kas. Tur dia asina e sali skol e ta pasa bai hunga bou di e palu. E tabata kana rondó di a palu, kore rondó di e palu. Mishi ku tur su blachinan i hasta konta e palu kon a bai na skol. Ora Jeroen a krese hasi 12 aña el a stòp di bai frekvente bou di e palu. E palu a bira tristu paso e no tabata mira Jeroen hopi mas. Un dia Jeroen a bin despues di hopi dia bek bou di e palu. E tabata tristu i a djis kai sinta abou pensativo. E palu a puntré: “kiko a pasabu ku bo ta tristu? Hunga ku mi no.” Jeroen a kontestá: “No, mi no ta mucha chikí mas. Mi a bira grandi i mi no ta kore hunga den kura mas. Mi ke hunga ku playstation pero mi no tin sèn.” E palu a bira tristu di mira Jeroen asina tristu. El a bisé: “Dikon bo no ta piki un par di mango i bende nan pa bo haña sèn pa kumpra un play station.” Jeroen a kore bai kue un saku i yené yen di mango. El a hasi esaki tres dia largu i a bende tur. Ku e sèn el a kumpra su playstation. A pasa añas sin Jeroen a bin hunga bou di e palu. E palu tabata tristu i bandoná.**

**Despues ku el a bira homber grandi el a bin sinta un dia atrobe bou di e palu di mango. Tristu i pensativo. “Hunga ku mi no” e palu a bisé.” Jeroen a kontestá: “No mi no ta hunga mi no tin tempu. Mi mester traha pa kria mi famia. Un kas mi mester pa mi por biba ku mi famia.” E palu a kontestá: “kòrta for di mi brasanan pa bo haña palu ku bo por usa pa traha bo kas. E no ta hopi pero tur pida palu ku bo mester bo por bin kòrta di mi.” Jeroen a bira kontentu i e dianan ku a sigui el a bin regular bin kòrta palu pa e usa of pa e bende haña poko sèn pa kaba su kasita. Ora e no tabatin mester di palu mas, Jeroen a bolbe keda largu sin bin bou di a palu. E palu tabata tristu.**

**Un dia Jeroen a bolbe bai serka e palu i mesora e palu a rog’é “hunga ku mi no.”**

**‘No mi no tin tempu no, mi ta yen di strès i mi mester relahá. Mare mi por haña un boto pa mi subi laman, leu for di hende i relahá piskando.” E palu mesora a kontestá: “Kap mi tronkon i traha un boto di dje pa bo por piska.” Kontentu Jeroen atuma un par di dia pa zag e tronkon pa**

asina e por a traha su boto. Asina e boto tabata kla e palu a keda tristu atras sin kompania.

Algun aña despues Jeroen a bin sinta bou di e palu. E palu a bira kontentu ku Jeroen a bin serka dje. “mi ta kontentu di mirabu, pero mi no tin nada mas pa ofresebu. Mi no tin mango mas pa bo kome of bende.

Jeroen a kontestá: “Mi no tin djente mas pa kome mango.”

“Mi no tin tronkon tampoko òf brasa pa bo por drecha bo boto.”

Jeroen a sakudí su kabes i kontestá: “Mi ta muchu bieu pa subi laman. Mi ta hopi kansá i mi mester di un lugá pa mi sosegá.”

E palu a bisé: “Mi rais ta muriendo pero kontra di dje bo por lèn bo kurpa i sosegá, mas mi no tin pa dunabu.”

Jeroen a lèn su lomba kantu di e palu i a sinti trankil i felis. El a realisá kuantu e palu a sakrifiká pa hasie felis. Pero tambe kon el a bonadoná e palu kada bes pa kore tras di su mes interes. Sin nunca kòrda ni sikiera wak si e palu mester di algu.

## Un Prenchi



Minister Dick ku Joanne Jones na apertura di Soeur Hedwig school



**E tim dinámiko di Soeur Hedwig school**



**Mgr. Louis Secco para mei mei. Na man robes dos miembro di direktiva di RK. Despues di nan Sra. Carla Ricardo. Despues di Mgr. sra. Monique representante Refineria Isla di Korsou, anto por último Jessy Naaldijk, direktor aktual di e skol.**



**Mgr. Secco bendishonando skol kompañã pa representante di Refineria Isla di Korsou.**



**Sr. Doran di Usona ku a duna lo máksimo pa por realisá Soeur Hedwigschool.**

### **Mucha djispou**

**Na skol maestra ta puntra Evan kon e lo deskibrí su skol ideal.**

**“Manera un soño, anto ora bo lanta bo ta kontentu di a soñe so.”**

**E maestra a sigui: “Anto kon lo bo deskibri ami?”**

**“No e ora ei semper ta un nachtmerry, ku despues mi ta lanta tur sofoká mainta.”**